

四庫全書

集部

欽定四庫全書

集部

後山集

目錄
卷一至四

詳校官庶吉士

臣汪彥博

檢討

臣何思鈞覆勘

覆校官中書

臣

汪學金

校對官中書

臣

袁文邵

謄錄監生

臣

蕭日所

欽定四庫全書

集部三

後山集目錄

別集類二 宋

卷一

五言古詩四十六首

卷二

五言古詩四十一首

卷三

七言古詩四十八首

卷四

五言律詩一百九首

卷五

五言律詩一百八首

五言排律五首

卷六

七言律詩七十六首

卷七

七言律詩七十一首

卷八

五言絕句三十二首

七言絕句一百四十五首

卷九

書一十通

卷十

書二十七通

卷十一

序九篇

卷十二

記一十五篇

卷十三

論四篇

卷十四

策二道

策問一十八首

卷十五

表一十三道

啓一十三通

祭文七道

卷十六

墓銘一十道

墓表二道

行狀二道

神道碑一道

卷十七

雜著三十九首

卷十八

談叢三十三條

卷十九

談叢七十六條

卷二十

談叢四十九條

卷二十一

談叢七十四條

卷二十二

理究三十七條

卷二十三

詩話八十條

卷二十四

長短句四十九首

雜體詩一首

臣等謹按後山集二十四卷宋陳師道撰師

道字履常一字無已彭城人受業曾鞏之門

又學詩於黃庭堅元祐初以蘇軾薦除教授

後召為秘書省正字事蹟具宋史文苑傳師

道集為其門人彭城魏衍所編後有衍記稱

以甲乙丙稿合而校之得詩四百六十五篇
分為六卷文一百四十篇分為十四卷詩話
談叢則各自為集云云徐度却掃編稱師道
吟詩至苦竄易至多有不如意則棄稿世所
傳多偽惟魏衍本為善是也此本為明馬暉
所傳而松江趙鴻烈所重刊凡詩七百六十
五篇編八卷文一百七十一篇編九卷談叢
編四卷詩話理究長短句各一卷又非衍之

舊本方回稱謝克家所傳有後山外集或後人合併也其五言古詩出入郊島之間意所孤詣殆不可攀而生硬之處則未脫江西之習七言古詩頗學韓愈亦間似黃庭堅而頗傷褻直篇什不多自知非所長也五言律詩佳處往往逼杜甫而間失之僻澀七言律詩風骨磊落而間失之太快太盡五言絕句純為杜甫遣興之格未合中聲長短句亦自

為別調不甚當行大抵詞不如詩詩絕句不
如古詩古詩不如律詩律詩則七言不如五
言方回諸人一祖三宗之說未免太過馮班
諸人肆意詆排要亦非篤論也其古文在當
日殊不擅名然簡嚴密栗實不在李翱孫樵
之下殆為歐蘇曾王盛名所掩故世不甚推
棄短取長固不失為北宋巨手也乾隆四十
二年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

後山集卷一

宋 陳師道 撰

詩

妾薄命二首

為曾南豐作

主家十二樓一身當三千古來妾薄命事主不盡年起
舞為主壽相送南陽阡忍看主衣裳為人作春妍有聲
當徹天有淚當徹泉死者恐無知妾身長自憐

葉落風不起山空花自紅捐世不待老患妾無其終一

死尚可忍百歲何當窮天地豈不寬妾身自不容死者
如有知殺身以相從向來歌舞地夜雨鳴寒蛩

送外舅郭大夫檠西川提刑

丈人東南來復作西南去連年萬里別更覺貧賤苦王
事有期程親年當喜懼畏與妻子別已復迫曛暮何者
最可憐兒生未知父盜賊非人情蠻夷正狼顧功名何
用多莫作分外慮萬里早歸來九折慎馳驚嫁女不離
家生男已當戶曲逆老不侯知人公豈悞

送內

唐虞顧其子燕雀各自隨與子為夫婦五年三別離兒
女豈不懷母老妹已笄父子各從母可喜亦可悲關河
萬里道子去何當歸三歲不可道白首以為期百畝未
為多數口可無饑吞聲不敢盡欲怨當歸誰

別三子

夫歸死同穴父子貧賤離天下寧有此昔聞今見之母
前三子後熟視不得追嗟乎胡不仁使我至於斯有女

初束髮已知生離悲枕我不肯起畏我從此辭大兒學
語言拜揖未勝衣喚爺我欲去此語那可思小兒襁褓
間抱負有母慈汝哭猶在耳我懷人得知

城南寓居二首

遊子莫何歸韋杜城南村秋水深可測挽衣踏行雲道
暗失歸處棲鳥故不喧牛羊閉籬落稚子猶在門
潭潭光明殿稽首西方僊平生修何行步有黃金蓮我
豈昔好徑報以履下穿洗足坐道場卒卒此何緣

憶少子

端也早豐下歲晚未可量我老不自食安得如我長
呱棄不子退省未始忘吾母亦念我與爾寧相望

寄外舅郭大夫

丈人魯諸生明刑如臯陶幸寬右顧憂未惜一身遥西
南萬里行可以絕繩橋慎勿冠惠文神母仁如堯

答張文潛

我貧無一錐所向皆四壁瀛洲足風露胡不減饑色昔

聞杜氏子剪髻事尊客君婦定應賢三梳奉巾櫛

示三子

去遠即相忘歸近不可忍兒女已在眼眉目略不省極
喜不得語淚盡方一哂了知不是夢忽忽心未穩

送蘇公知杭州

平生羊荊州追送不作遠豈不畏簡書放麕誠不忍一
代不數人百年能幾見昔如馬口銜今為禁門鍵一雨
五日涼中宵大江滿風帆目力短江空歲年晚

田家

雞鳴人當行犬鳴人當歸秋來公事急出處不待時昨夜三尺雨竈下已生泥人言田家樂爾苦人得知

幼嶺

外家英俊場季氏不好弄用意丘壑間頗以石自奉誰言拳握間意作萬牛重岱宗小天下不辦一席用

觀文忠公家六一堂圖書

生世何用早我已後此翁頗識門下士略已聞其風中

年見二子已復歲一終呼我過其廬所得非所蒙先朝
羣玉殿冠佩環羣公神文煥王度喜色見天容御榻誰
復登帝書元自工黃絹兩大字一覽涕無從似欲託其
子天意人與同歷數况有歸敢有貪天功集古一千卷
明明並羣雄誰為第一手未有百世公廟器刻科斗寶
樽蟠華蟲緬懷弁服士酬獻鳴琤琮插架一萬軸遺子
以固窮素琴久絕絃基酒頗闕供向來一瓣香敬為曾
南豐世雖嫡孫行名在惡子中斯人日已遠千歲幸一

逢吾老不可待露草溼寒葢

次韵蘇公西湖觀月聽琴并涉潁二首

清湖納明月遠覽無留雲人生亦何須有酒與桐君自
醉寧問客一盃復一樽平生今不飲意得同酣醺清言
冰玉質壞納山水紋殫精有後悟畜耳無前聞潛魚避
流光歸鳥投重昏信有千丈清不如二尺渾

衝風不成寒脫木還自竒坐看白日晚起行清潁湄三
穴未為得一舟不作癡路暗鳥遺音江清魚弄姿宇定

恠物變意行覺舟遲公與兩公子妙語含風漪但怪笑
談劇莫知賓主誰得句未肯吐鬱鬱見睫眉相從能幾
何行樂當及茲生忍自作難百憂間一嬉時尋赤眼老
不探黃口兒解公頭上巾一洗七年緇至潔而納汚此
水真吾師須公曉二子人自窮非詩

再次韵蘇公示兩歐陽

公詩周魯後曳曳垂天雲府中顧長康風味如麴君非
公無此客請壽南山樽叔季大儒後偏醒亦同醺心與

柏石堅韋成綺繡紋多難獨不補少慙今無聞時無古
今異知有功名昏可使百尺底不作數斗渾

次韵蘇公勸酒與詩

五士三不同煩公以詩訴強酒古所辭妙語神其吐自
念每累人舉扇無我汚復使兩歐陽縮手不分付平生
西方社努力須自度不憂龜九頭肯為語一誤頓悟而
漸修從此辭世故公看萬金產寧能一朝具兩生文章
家夙紀鳴蟬賦請公堅城壘兵來後無數

次韵蘇公題歐陽叔弼息齋

行者歸故里居者愛吾廬
生湏着錐地何賴汗牛書
丈室八尺牀稱子閉門居
百為會有還一足不願餘
紛紛幼老間失得了玄虛
客在醉則眠聽我莫問渠
論勝已絕倒句妙方愁予
竹几無留塵霜畦有餘蔬
相從十五年不為食有魚
時湏一俛仰君可貸遽蔭

寄參寥

平生西方願擺落區中緣
惟於世外人相從可忘年
道

人贊公徒相識幾生前早作步兵語晚參雲門禪拾策
孤山下一室頗蕭然林昏出幽磬竹杪橫疎煙昨日寄
書至坐想參寥泉此泉如此公遇物作清妍一別今幾
時綠首成白顛子亦憐我老我豈要子憐會逢萬里風
一繫五湖船酌我巖下水咽子山中篇

寄答王直方

人情校往復屢勉終不近新詩已經年知子不我怨生
世餘幾何尺筮日取寸懷祿有遐心從俗無遠韻時從

暗中歸數過林下飯平生功名意回作香火願三年不
舉觴吻頻煙火炊豈無兩蒼龍霑我一雨潤官麤詩未
工猛乞無小靳人生如此耳文字已其閨是身雖臭腐
寧作青紫檀永懷忘年友死矣餘令聞念子頗似之老
我何所恨

規禪停雲齋

淨居衆天人宮殿隨所適少仕老不歸重門閉榛棘道
人秀叢林妙語出禪寂是身如浮雲隨處同建立平生

與二子嗜好同一律我此復助緣語綺已多責何年一
把茅據坐孤岑律呵佛罵祖師塗糊千五百

次韵答晁無斁

女生願有家名妾以不聘田叟亦慕君又惡不由正欲
行不問途已破寧顧甌耕蠶無一廛庖井要三徑還家
憂患餘挽鬚兒女競十年寧有此一寒可無命平生晁
夫子得士公室慶稍無車馬音復作賓客請論文到韓
李念舊說蘇鄭長年斷消息獨語誰和應此生恩未報

他日目不瞑歸臥無好懷扣門有佳聽詩來霜雪後更覺天宇淨少好老未工持刃授子柄

次韵晁無數夏雨

咫尺隔山海作書問如何蟻垤既蓄糧蛙窟如鳴鼃積暑復一雨斧斫仍手摩鉤窻欲懸麻出門已橫河入言月離畢未必致滂沱東臯繁草木蘭艾不同科驚魚畏密罟獨鳥鳴南柯稍無蟲飛喧復覺蟬語多因聲作好惡與物殊未和臥聞夜來雨歸種故山禾百年須下澤

萬里付長羅先生斷百好尚以詩作魔縮子萬言手聽
渠七字哦室爾人則遠燕默老者歌思君得老瘦觸熱
生積痼

寒夜有懷晁無斁

同好共城郭十日不一顧人事雖好乖吾生亦多忤闔
門對妻子歲月不可度閉目寧用遮停杯仍下筯獨無
區中緣永懷巖下趣平生三徑資安得一朝具萬里初
歷塊前驅告曛暮歸懷屬有思棄世不待怒老境厭遶

遲人情費將護向來張長公吾亦從茲去燈花頻作喜
月色正可步預恐何水曹明朝有新句

還里

曠士愛吾廬遊子悲故鄉慷慨四方志老衰但悲傷虛
名自成誤失得略相當莫年還家樂未覺道路長閭里
喜我來車馬塞康莊爭前借言色草木亦晶光向來千
人聚一老獨徜徉手開南陽阡松柏鬱蒼蒼永願守一
丘脫身萬里航平生功名念倒海浣我腸款段引下澤

斷弦更空觴尚從北山南有文移路傍

魏衍見過

暑雨不作涼爽風祇自高我老亦衰疾奈此正鬱陶魏
侯有新語高處近風騷隱几聆五字未覺歷日勞灑然
墮冰井起粟豎寒毛三山已在目萬象誰能逃歷險見
絕足過口味豚膏願為夏雷鳴莫作飢鳶號

晚望

黑雲映黃槐更着白鳥度蟬鳴不餘力蛙腹能許怒稱

目有佳思側徑無好步興來成獨往意得誰與賦

和黃預感秋

宿雲護朝霜秋陽佐殘暑蠅癡驅復來汗下拭莫禦庭
梧自黃隕風過成夜語幸是可憐生胡然遽如許黃生
多新詩如盆

一作盞

繭抽緒唱高難歛乃雋永得咀意

合無古今投暗存迎拒名成弟子韓價重先生楮向來
得斯人孰謂予齟齬晚炊鄰僧米晝拾狙公茅甘酸皆
適口霜黃

一作盞

未登俎門有曲逆車謗甚北山女寧為

溝中斷不作太倉鼠老退無好懷續明然兩炬搔首不成眠寒蟲促機杼

和魏衍元夜同登黃樓

車馬競清夜人物秀三楚登臨得免俗茲樓豈時覩同來兩稚子冠者亦四五落落俱可人頗亦厭歌鼓山月出未高潛鱗動寒渚檣燈接稀星奪目粲不數魏侯轉物手百好趨就叙得句未肯吐秀氣出眉宇水淨納行影山空答脩語夜氣稍侵肌鳥駭去其侶清游豈有極

喜事戒多取投靜未免喧於今豈非古永懷寂寞人南
北忘在所橫嶺限魚鳥作書欲誰與情生文自哀意動
足復佇憑楹一作檻共一點望舒已寢午

和魏衍三日

林花女嬃紅春水瓜頭綠步蹇我三休來同君一足苦
嗟所歷小不盡千里目暮景向昏鴉歸塗取脩竹

和黃充實春盡遊南山

逐勝缺勇功錢春無少色出門欲何向坂丸隨所擊百

年餘幾何十步復一息同來二三子楚楚頗脩飭行前
強老夫徑捷疲峻陟山門開煙霏禪房閑岑寂口燥沾
茗椀久厄此為德逐日下西山草路荒不識回溪轉鉤
曲門徑入繩直故人喜領客內愧積腸臆所來為親舊
掃除稱寥閬疾風無永勢過雨有餘瀝高花初欲然平
荷已如拭因君感衰盛醜好移頃刻交新厭區區話舊
聽歷歷談間十一二四座已頃側茅屋漏一作濕風霜山
田帶沙礫尚能哀此老舉手觸四塞君如澗底松超拔

出天辟學詩有新功黃魏共推激

生與魏行黃預將

陳留市隱者

陳留人物後疑有隱屠耕斯人宜其徒滿腹一杯羹
娉婷小家子與翁同醉醒薄暮行且歌問之諱姓名子豈
達者歟槁竹聊一鳴老生何所因稍稍聲過情閉門十
日雨吟作飢感聲詩書工發冢刀籥得養生聖有不暖
席接浙去齊行

一作飛走不同穴孔突不暖
黔孔突字訛黔復失韻非是

送魏衍移沛

積雨斷行路重江未安流胡為冒艱險迫此帛米謀歲
晏風作橫未寬為子憂卒然託異縣所得如所求主人
如古人待士禮亦優人情樂新知豈不懷舊丘我貧無
四壁愛爾胡能留子也尚不容吾代諸公羞勿云百里
遠已作千山愁念子捨我去誰復從我遊諸石吾未識
因子卜可一作喜不能此已可尚終焉致綢繆

送法寶禪師

平生趺鐵脚道價喧宇宙望禮東南雲吾今獨何後晚

始識其子瑤林一枝秀初聞飲光笑復作空生瘦今年
退復禪袖手不肯又真成菩薩魔未免化城咎白月懸
清光大鐘得辭扣知止一何勇隨緣豈無復豐臺兩禪
子三請期一觀翩然挈瓶孟百里往相就古寺風雨餘
觸目初邂逅夙昔有淨緣歡然宛如舊教我早自異業
成誰得救世故已備嘗躊躇復何候鑽火勿停手時來
自渠透慙慙禮白足吾為泰山溜

贈趙奉議

為惠不必廣但問與者誰受施何用多名義以為資平
生師友間四海參寥師一窮無四壁百代有千詩再逐
越淮江三年魯中歸初無贊公色不異淨名衣才如得
風鷗已復觸藩羝路貧誰肯憐語妙君所知我往立談
間款若白受緇乃知仁者聽不待辛苦詞趙侯名教士
勁氣噴長霓論吐天下公而合吾所私明憲弄文墨妍
語含英姿要與識者論且避羣兒癡舊好無新功終年
此交綏未須堅百戰當即建降旗

和鄭戶部寶集丈室二首

遠遊遊則遠安心已安茅茨更何事一坐五年寬客
來問法要示以無所還勿云空生默聽者不勝言

貴有空王章貧無置錫地衝風窻自語浣壁蟲成字向
隅有知音闔門接強對只道庭前柏西來本無意

寄黃充

俗子推不去可人費招呼世事每如此我生亦何娛黃
生後來秀純茂靜者徒不見動經月來亦不須與人事

已好乖可復自作疎子雖向人嬾勝處不可孤迨此田
事休仍當秋一作寒雨餘深知阻泥濘步履意何如

咸平讀書堂

昔人三百篇善世已有餘後生守章句不足供嘯嘯一
登吏部選筆硯隨掃除閑閣畫眉嫵隔屋聞歌呼奉公
用漢律寧復要詩書俛首出跨下枉此七尺軀今代陶
朱公不作大梁屠計然特未用意得輕全吳為邦得畿
縣政密自計疎寧書下下考不奉急急符用意簿領外

築室課典謨平生五千卷還舍不問塗近事更漢唐稍
以詩自娛復作無事飲醉臥擁青奴桃李春事繁軒窗
畫景舒鳴屋鳩渴雨窺簾燕哺雛休吏散篇帙風篁獻
笙竽欣然一啟齒斯民免為魚

和冠十一同登寺山

度暑無好懷憑危略幽致衣冠蔚如林從我才一二茲
山昔深登歲月誰得記尚有名勝流不與金石悴孰知
千載後我與子復至煙昏倏見燈洪發疑

一作恐

無地領

略章句手割據英雄志興壞容一瞬今昔當幾喟圍山
缺西北放目不可制歸懷納清境夜榻成良寐零落壁
間詩豈特彼所媿會逢南過適不問西來意

謝孫奉職惠胡德墨

奚李風流盡法傳外諸孫常山陳瞻子懷抱自高擗孰
云勝潘翁惟眉山公言四海未盡識一變歸九原胡郎
少年子外家典刑存一點落髹漆重價壓璵璠孫侯磊
落人情義久益惇解囊贈玄圭孰知師白猿我資不解

書下筆輒自暖良寶不受辱隱默面稱冤

與魏衍寇國寶田從先二姪分韻得坐字

將老蒙誤恩受弔不受賀欲起尚遲回積閒習成情向
來二三子相與守寒餓一日不可無三歲安得過是時
秋益高夜永月初墮漏鼓已再更坐者餘幾箇酒薄多
可強談勝堅莫破簷昏讀字細林缺瞻星大吳吟未至
慢楚語不假些懷遠已屢歎論昔先急唾身世喜相違
真成螳旋磨平生陳孟公歲晚不驚坐

禮武臺坐化僧

時呂希哲作單州守臺屬單州

至人本無心起滅因衆緣化盡悲願在留形此臺巔聞
名與致敬獲福皆無前千年一鉢水宿疾幾人痊驍雄
兗州軍馬步餘數千一呼可摧山四合如垂天老幼十
八村頃刻理無全哀鳴寄香火毀塔投其磚或怒忽驚
奔如有所見然等觀同一子豈特此所憐我來已再見
童稚亦虔虔發火觸暗室青燈已娟妍始讀壁間碑妙
力隱不傳頗恨語未工安得筆如椽歸路雲月黑濤波

隔長川溪翁停舟待相喚聲相連解纜風泊岫中流水
入船歌側脚不停竟脫蛟魚涎興壞如有待適當使君
賢定能選妙士拂塵起重煙肯承靈山囑早契少林禪
丐我一片石併刻維摩篇

和謝公定觀祕閣文與可枯木

斯人不復有累世或可斯每於丹青裏一見如平時壞
障塵得入慘淡令人悲墨色落欲盡嚴顏終不移朽老
莫使年石心烏銅皮念此猶少作未盡冰霰姿北枝把

異鵲意定了不疑惜哉不得語胷次幾興哀一為要貴

役可復愧

一作驛

畫師隱奧雖可惜塗抹復見遺謝侯名

家子感慨形苦詞豈惟語畫工勁特頗似之何當補諫
列一吐胷中奇

後山集卷一

欽定四庫全書

後山集卷二

宋 陳師道 撰

詩

和鮮于大受崇仙觀餞別曾元忠

此別未為遠兩都東西州情親有乖隔江湖成阻修脫
塵度翠密徐行當尋幽各有惜別懷共此一日留意合
豈待約酒盡不更求闕詞固未可忍手亦何猶
是日題壁坐
有黃冠師未解逍遙遊興來我與共醉罷君當休僧房

火可親此樂行且謀萬事日糾紛高懷元一丘

和蘇公洞庭春色

洞庭千木奴寸絲不挂手來輸步兵厨釀作青田酒王

家玉東西未覺歲華走方從羅浮山

羅浮山有仙人種桐處

已作

南陽壽還將甕頭春慰予雪入牖我方縛禪律一舉煩

屢嗅東坡酒中仙醉墨粲星斗詩成以屬我千金須弊

帚何曾尊俎間着客面顰黝定須笑美人

趙有覺者平原君美人笑

之
蘸甲不濡口

山口阻風

夕風朝未回來雲去為雨繫舟直山口天意遽如許
瀟風兩方鬪丘原莫當怒兩山為俯仰一鳥不得度
臨深負高枕偷生寧得所歷歷數過帆當塗氣如虎
快意亦適然淹泊豈吾取遡洄更去留未易相爾汝
行登東山顛壯觀前來觀九澤不滿眼五丈方一縷
茲山昔誰遊巨野傳自古菰魚無凶年未利猶不禦
荷隩活萬人梨埒視千戶東方富絲麻小市藏百賈
連檣自南北行談

雜秦楚向晚風力微湖清魚可數空倉烏鳥樂外舍
牕扉語身非天下惜家無十金聚欲留盜賊迫欲去波濤
怒兩者爾何從一死吾未與

登冥山

東山如覆孟石塔仍數層昔人行樂處時過名不稱秋
風變草木樵徑餘薪蒸四顧一水間不復知溜澠菰蒲
萬世利煙火千人冒平住登山脚歲晚如不勝求田君
勿問撫髀吾何能飛鴻將目遠秋水留心澄茲遊豈不

朽作歌記吾曾

次韵荅少章

秦郎淮海士才大難為弟蔚然霜雪後不受江漢洗春
畦不滿眼采掇到芹薺多病促餘年秋光欲辭抵儒林
丈人行掘起三界底出入銀臺門為米不為醴白頭容
非面斯文分一體媿我無異聞口闕不得啓

送路紉歸老丹陽

身退不待年意足不待餘寧聞有餘論但問我何如才

名四十年盛氣蓋諸儒獨無金水力竟與鼃黿俱晚為
府中掾直前不趨起曾何媿俯仰頗亦困囁嚅有粟尚
可餬有酒尚可娛一朝脫章綬用意不躊躇富貴亦何
有惜君寧挽裾人生一世間僅得還其軀謝公江海人
此計竟亦疎千金一大錢兩子雙明珠妙語發幽光東
坡為歎歔不知兩疏去能亦有此無聊為三徑資從子
並門居

謝傅監

好士如好色昔聞今則無平生席為門未識長者車曠
士慕林谷羈人辱泥塗願為執鞭役莫順下風趨去年
辱公先懷刺留寓居我往拜其門鶯鶯鳴高梧論交不
計年取材忘其愚一寒我如此百鎰公無餘今年賀公
歸乃復過我廬當使有近行簪門有長須小家不耐事
雞飛犬升閭莫歸自有恨親顏一何娛汝家吾無憂能
致賢大夫吳公漢庭右賈生世用疎平分太倉粟盡讀
鄴侯書士為知己留不為食有魚三言移曾母投杼公

何如

次韵荅秦少章

學詩如學仙時至骨自換縹緲鴻鵠上衆目焉能玩子
從淮海來一喙當百難師儒有韓孟拭目互驚惋老生
時在旁縮手媿顏汗黃公金華伯莞爾回一眄彼方試
子難疾前不應懦要當攻石堅勿作搏沙散珪璧雖具
美礪錯加璀璨我老不足畏後生何可慢

次韵荅子實少章二首

英英黃金花論時不論美靖節骨已朽棄捐乃其理兩
公意有餘采采今未已尚念白頭生臨風嗅霜蕊
交新情已故室遠人則邇杯酒不相忘一朝得二子初
花美無度後時終可鄙與汝卧秋風看君雙控鯉

寄晁以道

兩官俱為鄰常若千里遠經年不通書子孰知我嬾相
期宇宙外肯復校繁簡我愚亦知此子意宜不滿子教
東方生自視何益損人言不當價一錢萬金產湏子五

千卷丹筆校黃本字家太史氏名成南北阮道山鴻鴈
行豈惟私門衍功名須老大四十未為晚快意會有違
急行寧小緩忽有河山阻遂恐消息斷我獨不念此人
窮令智短子勿放我慵書來慰愁眼

寄邢和叔

昔作梁宋遊幽憂廢朝昏閉門無往還不應兒女喧隔
牆聞剝啄莫夜誰叩門知是邢夫子低回過高軒願為
布衣交不顧年德尊惓惓立談罷又見東南奔江湖多

病後僅免餉魚黿久廢數行書
因人問寒暄但愛孤山西松筠
數家村便欲築居室插秧仍灌園
生前不自愛身後何足論草玄笑
揚雄贊易悲虞翻文章徒自苦紙
筆莫更存却尋南郭老隱几學
忘言他日宦遊客誤入桃花源
葦間見漁父誰識王侯孫

贈闕彥長

少年初識字已誦子虛賦嘗疑
天上人已離人間去蹉跎二十年
久自歎遲暮倦遊梁宋間却踏
江湖路此地

始逢君秋陽破朝霧白首鬢毛新青衫顏色故問君胡
為然竟坐文字誤人事久難知高才常不遇論人較賢
智富貴寧在數不見竹林詩山王俱不與湖塘發高興
山林有佳處迨此閒暇時觀游莫辭屢功名如附贅得
失何用顧但當勤秉燭長願隨杖屨

平翠閣

我家山水間耳目厭華麗間道浙西山經年通夢寐從
為遠遊客忘却歸來計欲置湖上田謝絕人間世湖山

多變態橫斜光氣異隨山轉朱閣臨顧窮幽邃惟存宣
公樓浮空堆亂翠疑是水仙人臨牆露高髻道人亦愛
山朝昏閱終歲最愛烟雨中半撩青羅袂我來悲歲晚
風霜掃昏翳不見嶺頭雲未盡登臨意

次韵應物有數黃樓

一代蘇長公四海名未已投荒忘歲月積毀高城壘斯
樓亦何與與人壓復起紛紛徒爾為長劒須天倚循分
即可久吾行誰與止邇來賢達人五十笑百里賴有寇

公子衆毀聞獨美直氣懾狂童牽聯皆可紀少公作長
句班揚安得擬頗有喜事人睥睨欲槌毀一朝陵谷變
天語含深旨驚倒樓前人今朝有行履

秋懷十首

以雨荒深院菊霜
倒半池蓮為韻

昨日山中雲今朝山下雨牛羊沒禾黍蟋蟀促機杼磨
刀洗盆爰社臘不勝數豈無聚斂吏觸手丞相怒
有家洙泗間歲晏榛棘荒稍知田家樂感此歸意忙老
馬甘伏櫪遊魂還故鄉四十尚無君天下未敢忘

採薪墟墓間行歌當歸耕向來輕簿子懷謖以為榮喘喘轅下犢力盡官泥深壯哉八百里一割探其心

翩翩王侯孫館我翠微院粥飯隨鐘魚朝昏黃庭卷中年妻子累往世西方願獨無詩書力尼父安得怨

黃公輕千乘尚愛五斗祿風雨聽朝雞歲月老松菊平生白蓮社不受一塵觸識字即投閣貴者須食肉

昔作九日斯一覽知四方夜雨秋水深裂風畏褰裳尊空囊亦空花且為我黃官奴覆青綾破屋任飛霜

翼翼陳州門萬里遷人道雨淚落成血着木木立槁今
年蘇禮部馬迹猶未掃昔人死別處一笑欲絕倒

籊籊孤竹君長我一身半凜然霜雪間時至亦陰換與
王子猷永結忘言伴可使溪壑姿充我眼中玩

北闕書不上南山田不歸朝暮陳州門悠悠此何為我
老何所為暖日聊差池君聽城上鳥啞啞端為誰

潭潭光明殿稽首西方僊平生脩何行步有黃金蓮我
豈昔好徑報以履下穿洗足坐道場卒卒此何緣

次韵蘇公西湖觀月聽琴

公詩端王道亭亭如紫雲落世不敢學謂是詩中君獨
有黃太史抱杓挹其尊韵出百家上誦之心已醺黃鍾
毀少合大裘擯不文世事如病耳螳鬪作牛聞苦懷太
史惠養豹煙雨昏後世無高學舉俗愛許渾

春酬應物

論世闕真是憎好成愚賢衆手挽跛牂擬度驂騑前與
子早相好於今不知年自從欲着帽憂喜同華顛生世

如風花高下亦偶然填溝偶不死揮刃忽自全病馬試
春早枯魚縱奔川稍思升斗祿筦庫未闕員一饑尚可
忍百歲當復延相余乘下澤得句要子宣此生期樂死
他日須詩傳縮手着袖間彈棊一爭先

次韵德麟督叔弼季默詩及破余酒戒

歲月不相貸夜牀衾簟秋朝來明鏡中作意多少留惟
酒可為娛顧我非其流丈夫意氣合珮玦不循鉤意行
無人非駿發不中休相逢問何如頗復中之不清坐豈

不好致真宜糟丘兩歐以詩鳴與俗同沉浮百鳥畏嘲
弄往和長鳴鷗相寧忍快便風飄萬斛舟

次韵蘇公獨酌

雲月酒下明風露衣上落是有何好草草成獨酌使
君顧謂客老子興不薄飲以全吾真醉則忘所樂未解
飲中趣中之如狂藥起舞屢跳踉罵坐失酬酢終然厭
多事超然趨淡薄功名無前期山林有成約身將歲華
晚意與天宇廓醒醉各有適短長聽鳬鶴

次韵蘇公獨酌試藥玉滑盞

僊人棄餘糧玉色已可斯小試換骨方價重十冰蕞灌
以長白虹渺若江海瀰浮之端不惡舉者亦何辭但媿
聞道晚早從鴈門師律部無明文可復時中之汝陽佳
少年三斗出六奇家有持杯手兩好當一施風吹酒面
灰月度杯心遲百年容有命一笑更須時

次韵德麟植檜

種木待成材聊為十年事日中趨百里寧問萬牛費植

檜三尺強已有凌雲氣生世能幾何擬作千歲計衆人
笑拍手君子用其意蕭蕭孤竹君忘言理相契名以金
石交椿楊豈奴婢緬懷萬仞顛千丈蔚蒼翠蟠根泉石
底用意霜雪外寧須大厦才坐待斧斤至散為風雨聲
密作牛馬蔽

送叔弼寄秦張

廬陵四公子吾及識其半叔也英達人平易亦稍悍於
時吾始壯敗壁不塗墁孤身客東都轉食諸公館時來

扣君門百遍不留難傾心倒囊笈燕語徹昏旦磨折挽
為親少得而多患相過汝潁上歲月不勝歎君才得公
餘十日而十歲舌端懸日月筆下來江漢此行不尋常
談者方一貫逸足寧小試寶刀當立斷用意不崎嶇欲
得志挾彈目今平生親稍作春冰泮因聲督張秦書來
不應緩

次韵德麟吳越山水

吳山那可說已覺心耳靜忍事如忍欲可過不可騁人

生如此耳黃白滿朝鏡寧懷斗升粟不理東南艇君從
湖上歸頗說寒事竟沙草柔動色溪喧魚不定煩君冰
玉句無作江湖興君詩如靜女妙絕人所敬不更風雨
秋下有桃李徑試寫孤竹君名成三絕鄭

龍潭

清澗下無際落日回風瀾凜然毛髮直敢以笑語干陂
陀百尺臺蔥翠萬木蟠驚飈振積葉清霜作朝寒水旱
或有差精禱神其難魚龍同一波信有水府寬向來三

金史卷一百一十五
卷二
日雨賴子一據輦何以報嘉惠寒瓜薦金盤萬口待一
飽歸臥神其安猶須雪三尺盛意莫得闌

贈魯直

相逢不用早論交宜晚歲平生易諸公欺人真可畏見
之三伏中凜凜有寒意名下今有人胷中本無事神物
護詩書星斗見光氣惜無千人力負此萬乘器生前一
尊酒撥棄獨何易我亦奉齋戒妻子以為累君如雙井
茶衆口願其嘗顧我如麥飯猶足填飢腸陳詩傳筆意

願立弟子行何以報嘉惠江湖永相望

次韵蘇公竹間亭小酌

自昔

一作至音

有遺韵小飲不盡觴坐待竹間月奈此雲影

長起行林下路散策踰平岡破眼一枝春著意千葉黃

暄寒會有分蜂蝶來無央鳥語帶餘寒竹風回妙香緬

想兩公子

此有缺文三字

朝陽斯人班馬後如圭復如璋相逢

了無得佳處每難忘

送李奉議亳州判官四首

謝公中年後畏與親友別數日懷抱惡每笑冠纓絕生
有四方事死當一語決前笑今則悲吾哀擬何說着鞭
何必先倒筆不容掣鞭爾轅下駒萬里一改轍

祁氏號外府藏室多異書因公有餘力一覽意何如為
學雖日益受益不受誣正須高着眼濠梁有遊魚

吾友孫子實愛學吾所畏持身如處子得句有餘味交
驩艱難際凜然見名誼吾病臥里中車馬日一至遣醫
饋梁肉憂喜見顏際慇懃勸加飡代我破戒罪一別已

三秋君室乃其季輪囷見眼中不作千里外因聲問何如胡不枉一字

吾友張文潛君行乃其里當年釣遊處壯者或可指聞風起遐想意作千古士不知塵土中奴推婢不齒胷中無一塵筆下有百紙勿問見自知未語君已喜與遊今已後行已勿停軌

大風

梁山泊

積陰風易作隆寒

一作風

聲益急百為定有數一動必三

日犇墮水勢壯掣扶波頭立前行後浪一作者促突起旁

交射崩騰萬騎來倏忽一箭扶擁殘蒲葦盡簸蕩魚龍

泣私憂地軸脫已分梁山沒向來萬斛重不作一葉直

舟行雨水間觸突聲悉率路轉帆舉落舟排水壘積經

事長一智中人所知識千金不垂堂豈復待一失窮途

得偉觀老氣猶少色一作邑事定不敢一作未得忘嗟來庶可

及一作安

後山集卷二

欽定四庫全書

後山集卷三

宋 陳師道 撰

詩

贈二蘇公

岷峨之山中巴江桂椒桺櫨楓柞樟青金黃玉丹砂良
獸皮鳥羽不足當異人間出駭四方嚴王陳李司馬揚
一翁二季對相望奇寶橫道驥服箱誰其識者有歐陽
大科異等固其常小却盛之白玉堂典謨雅頌用所長

度越周漢登虞唐千載之下有素王平陳鄭毛視荒荒
後生不作諸老亡文體變化未可量萬口一律如吃羌
妖狐幻人大陸梁虎豹却走逢牛羊上帝惠顧被不祥
天門夜下龍虎章前驅吳回後炎皇絳旂丹轂未冠裳
從以甲冑萬鬼行乘風縱燎無留藏天高地下日月光
授公以柄扶病傷士如稻苗待公秧臨流不度公為航
如大醫王治膏肓外證已解中尚強探囊一試黃昏湯
一洗千年新學腸老生塞口不敢嘗向來狂殺今尚狂

請公別試囊中方

嗚呼行

去年米賤家賜粟百萬官倉不餘掬青錢隨賜費追呼
昔日剜瘡今補肉今年夏旱秋水生江淮輸粟千里行
不應速水救近渴空倉四壁雀不鳴似聞為政不為費
兩不相侵兩相濟十年斂積用一朝驚濤破山風動地
送杜侍御純陝西轉運

餽糧千里古無策木牛流馬功不極邊頭數米換黃金

將軍汗馬未伏櫪黠羌人面作胡語鳥鼠貪生爾如許
熊虎可避蟲可驅覆巢熏穴意何如漢虜相當庸可盡
聊城正用一封書巧手莫為無麪餅誰能留渴湏遠井
國家有急君得辭徐人不勞扣闕請隴上壯士莫捫舌
河西狂王防繫頸向來此地幾送迎草間翁仲口不瘡
十年兩熟飽可待一歲四守人何心老稚持車車不留
歸人不行行轉頭關中正湏蕭丞相省內早要富民侯

出清口

家世山東飽耕稼晚託一舟順流下漁溝寒餅不下筋
推施轉頭更五夜平明放溜出清口霜落潮回霧連野
平淮一夢三十里有日無風神所借似憐憂患滿人間
百孔千瘡留一罅文章末技將自效語不驚人神可嚇
子女玉帛君所餘寄聲白鳥煩多謝

猴馬有序

楚州紫極宮有畫沐猴振索以戲馬頃索以驚園
人不測從後鞭之人言沐猴宜馬而今為累作詩

以導馬意

韓鄂四時纂要曰常繫獮猴於馬坊內辟惡省百病令馬不著疥

沐猴自戲馬自驚
園人未解猴馬情
猴其天資馬何罪
意欲防患猶傷生
異類相宜亦相失
同類相傷非所及
志行萬里困一誤
吐豆齟齬甘伏櫪

送黃生兼寄二謝二首

南第諸兄蚤相見
別時託子以無倦
百年論交見子心
一朝取別寧吾願
妙歲遠遊真所難
肯為得官近長安
聖作詩書端有意
猶須用之科舉外

城西兩謝俱能文，穰丞精悍吾所聞。每讀吾詩得人意，
使不能文已可人。我昔謝公門下士，早年妄作功名意。
如今老寄潁河東，九泉雖深媿此公。

次韻蘇公西湖徙魚三首

窮秋積雨不破塊，霜落西湖露沙背。大魚泥蟠小魚樂，
高丘覆杯水如帶。魚窮不作搖尾憐，公寧忍口不忍鱗。
修鱗失水玉參差，晚日搖光金破碎。咫尺波濤有生死，
安知平陸無灘瀨。此身寧供刀几用，著意更須風雨外。

是間相忘不為小濠上之意誰得會枯魚雖泣悔可及
莫待西江與東海

赤手取魚如拾塊布網鳴舷攻腹背豈知激濁與清流
恐懼駢頭牽翠帶居士仁心到魚鳥會有微生化餘鱗
寧容網目漏吞舟誰能烹鮮作奇碎我亦江湖釣竿手
悞逐輕車從下瀨生當得意落鷗邊何用封侯墮鳶外
不如此魚今得所置身暗與神明會徑須作記戒鯨鯢
防有任公釣東海

詩成落筆驪厖塊不用安西題紙背
小家厚斂四壁立
拆東補西裳作帶
堂下鰥鰥牛何罪
太山之陽人作鱸
同生異趣有如此
瓶懸甕間終一碎
流水長者今公是
雨花散亂投金瀨
人言充庖湏此輩
慈觀更須容度外
賜牆及肩人得視
公才槃槃一都會
有憐其窮與不朽
我亦牽聯書玉海

寄晁載之兄弟

人言婚宦情欲本
吾始求脫君已半
孰知一世如一夢

在夢而覺寧待旦寒簷淨雨作秋聲冷屋風燈挑不明
樽前已作十年語後會未期吾屢驚一聞七字心已識
鉤章棘句天與力念子方壯我已衰不見參天二千尺
季也亦有詩百篇叔子擬度驂騑前端能過我三冬學
可復參儂一味禪

別圓澄禪師

法施老人卧不出呼我取別行問疾磨盤拭筯勸一飽
少待須臾莫倉卒早年著眼觀文字萬卷初無一言契多

生綺語未經懺半世虛名足為累此去他來尚有緣頭
童齒豁恐無年慙懃三請久住世弊惡可念未可捐平
生准擬西行計老著人間此何意他年佛會見頭陀知
是當年老居士

舟中二首

惡風橫江江卷浪黃流湍猛風用壯疾如萬騎千里來
氣壓三江五湖上岸上空荒火夜明舟中起坐待殘更
少年行路今頭白不盡還家去國情

野火燒原雉昏雒黃塵漲天牛亂鬪江間無日不風波
老去何時脫奔走詩書滿腹不及口遮日寧須鉤竿手
愧爾茅簷炙背人仰目青天搔白首

古墨行

有序

晁無斁有李墨半丸云裕陵故物也往於秦少游家
見李墨不為文理質如金石亦裕陵所賜王平甫所
藏者潘谷見之再拜云真廷珪所作也世惟王四學
士有之與此為二矣嗟乎世不乏奇乏識者耳敬為

長句率無數同作

秦郎百好俱第一烏

一作墨

九如漆婆如石巧作松身與

鏡面借美於外非良質潘翁拜跪摩老眼一生再見三
歎息了知至鑒無遁形王家舊物秦家得君今所有亦
其亞伯仲小低猶子姪黃金白璧孰不有古錦句囊那
可敵睿思殿裏春夜半燈火闌殘歌舞散自書細字答
邊臣萬里風塵入長筭初聞橋山送弓劍寧知玉盃人
間見夜光炎炎衝斗牛會有太史占星變人生尤物不

必有時一過目驚老醜念子何忍遽磨研少待須臾圖

不朽

魏衍注曰少游之墨嘗許先生為他日墓誌潤筆先生嘗語衍作此詩時少游尚無恙然終先逝去

明窓淨几風日暖有愁萬斛才八斗徑須脫帽管城公

小試玉堂揮翰手

蠅虎

物微趣下世不數隨力捕生得稱虎匿形注目搖兩股
卒然一擊勢莫禦十中失一八九取吻間流血腹如鼓
却行奮臂吾甚武明日淮南作端午

寄鄧州杜侍郎

絃

南陽老幼如雲屯連日城東候使君後者排前旁捷出
爭先見面作慇懃六年重來已白髮一日再見回青春
道傍過者怪相問共言杜母真吾親使君雖老心尚壯
文采風流諸謝上名家從昔杜陵人盛德於今丈人行
我昔卧病老彭城畫舫鳴鼓千里行致書饋奠初未識
丁寧勞苦如平生人言此事今未有古人中求還得否
忘年屈勢不虛辱公自

一作取

為德吾何取菊潭之水甘

且潔潭上秋花照山白請公酌此壽百年奕奕長為此
邦伯孰先一州後四方重金疊蓋登廟堂請從今日至
雲來月三十斛輸洛陽

答魏衍

我詩淺短子貢牆衆目俯視無留藏句中有眼黃別駕
洗滌煩熱生清涼人言我語勝黃語扶豎夜燎齊朝光
三年不見萬里外安得一身置汝傍邇來諸子復秀發
曾未幾見加端章剩欲推藏讓頭角豈是有意羣兒傷

於人無怨我何憾愛者尚衆猶吾鄉平生不自解嘲諷
禍來亦復非周防我哀氣索不自振正賴好語能恢張
詩家小魏新有聲舊傳秀句西里黃後生學行闕師友
臨路不進空迴遑看君事業青雲上聽渠螟螣生膏肓

招黃魏二生

出門不雨即遇風閉門值睡極力攻似聞湯鼎作吟聲
已賀勝敵收全功却思二子共一笑撥棄舊語無新工
卒行好步不兩得能致公等吾何窮魏詩黃筆今未有

顧我獨得神所鍾徑須相就踏泥潦已辦煮餅燒油蔥

和魏衍三日

堤沙泥盡未及塵江波不動風生紋虎頭魚尾不知數
朱旗一點來奔雲春容已老有餘態後稷雖古無前聞
踏青摸石修祕祝落日帶雨催行人聽詩對月兩不厭
頗覺過目徒紛紛君不見天寶杜陵翁屈宋才堪作近

鄰

和魏衍聞鶯

春力著人朝睡重，葉底黃鸝鳴自遠。
綠幕朱欄日觀明，回廊側戶風簾動。
昨夜春回到寒谷，好鳥飛來把修竹。
整翰厲觜初一鳴，已落君詩專妙獨。
退紅著綠春事殘，後時獨立知何言。
側聽不盡已飛去，懷抱此時誰與論。

答黃生

冰泥斷道雪塞門，遠方累日無行人。
卧聞喧呼誰叫閭，稚子往問鹿駭奔。
黃生學詩用一作力新急手疾口如

翻盆衝風踏凍，送七言要令寒屋回春溫。
是時積陰又

黃昏叫開索火驚四鄰邇來結字穩且勻豈不見我參寥君嗟吾老矣心尚存後來得子空馬羣徑須赤手縛麒麟四大海水一口吞丈夫意氣抗浮雲道逢其人兩手分妬婦拊膺王右軍

晁無咎畫山水扇

前身

一作生

阮始平今代王摩詰偃屈蓋代氣萬里入方

尺朽老詩作妙儉絕天與力君不見杜陵老翁語湘娥

增悲真宰泣

嗟哉行

張生服石為石奴下潦上乾如渴烏一朝償蹶須人扶
伏毒未動風出虛此生所得與昔殊韓子作志還自屠
白笑未竟人復吁以身濟欲未必愚欲久而速反所圖
嗟哉偉然二大夫

九月九日夜雨留智叔

騎臺九日登臨處只有歸人醉扶路千年二謝孰可代
我每苦留君只去花粗且為前人惜曲誤不解丞卿怒

只消著帽受西風不待風流到新句

九月九日與智叔鵬堂宴集夜歸

鵬堂從昔有惡客酒盡不去仍復索欲留歌舞盡客意
風雨和更作三厄佳辰難得客更難我窮無酒為君歡
只欲泥行過白下萬一簾疎見一斑

謝趙使君送烏薪

欲落未落雪近人將盡不盡冬壓春風枝冰瓦有去鳥
遠坊窮巷無來人忽聞叩門聲遽速驚雞透籬犬升屋

使君傳教賜薪炭妓圍那解思寒谷老身曲直不足云
冷窓凍壁作春溫定知和氣家家到不獨先生雪塞門

一作席
作門

謝冠十一惠端硯

百工營材先利器市道居貨如作贅書生活計亦酸寒
斷甃半瓦寧求備端溪四山下龍淵鬱積中州清淑氣
金身玉骨石為容河江屈流雲作使滑如女膚色馬肝
夜半神光際天地諸天散花百神喜知有聖人當出世

沒人投深索千丈探領適遭龍伯睡轆轤挽出萬人負
千歲之藏一朝致琢為時樣供翰墨十襲包藏百金貴
北行萬里更衆目冠卿好事不計費南鄰居士卿之孫
豐悴相從不為異似憐陶瓦磨竈煤輟贈不減前人志
人言寒士莫作事鬼奪客偷天破碎龜玉韞匱與無同
錦衾還客棄佳惠衆所欲得當有緣天獨於余可無意
敢書細字注魚蟲要傳華嚴八千偈

答黃生

魏衍注云時初冬尚無冬衣先生以背
子贈之堅不受到家以朱氏所贖二疋

寄之因
作詩

我無置錫君立壁春黍作靡甘勝蜜綈袍不受故人意
藥餌肯為兒輩屈割白鷺股何足難食鸕鷀肉未為失
暮年五斗得千里有媿寒簷背朝日

五子相送至湖陵

中年患別多作別早日諱窮常得窮勿云一水四十里
衣冠寒郭何人同周生子病輟身出劉子遠來今幾日
石家仲叔好少年頗能厭俗從吾律魏君不獨相從早

自君之來吾却掃歲月磨人孰能久反覆看渠難得好
湖陵古城風日寒情義乃知生別難高懷已為故人盡
交道應留後代看

湖陵與劉生別

觸寒歷險來特特媿無以當欣有得向來憂患不相捨
知子用心堅鐵石人畏有心事無難此語雖鄙理則然
君今意在翰墨間他日人爭讓一先

寄滕縣李奉議

滕大夫伯陽父孫烹小鮮治大國原一得何用五千言
弛災決獄人不寃盛氣走訟畏討論終歲斂吏不到門
子弟無賴皆西奔踵門父老如雲屯拊髀跳踉走兒孫
絳幡翠節歌嘖喧畫盆戴頂煙如焚繡襖綵軸箱帕繁
曲躬叉手前致言畜眼未見耳不聞暮年何以答此恩
請誦華嚴壽我君

和饒節詠周昉畫李白真

君不見浣花老翁醉騎驢熊兒捉轡驥子扶金華仙伯

哦七字好事不復千金模青蓮居士亦其亞斗酒百篇
天所借英姿秀骨尚可似逸氣高懷那得畫周郎韻勝
筆有神解衣槃礴未必真一朝寫此英妙質似悔只識
如花人醉色欲盡玉色起分明尚帶金井水烏紗白苧
真天人不用更著山巖裏平生潦倒飽丘園禁省不識
將軍尊袖手猶懷脫靴氣豈是從來骨相屯仰視雲空
鴻鵠舉眼前紛紛那得顧是非榮辱不到處只一作恐
朝來有新句勿言身後不要名尚得吳侯費百金江西

勝士與長吟後來不憂身陸沈

題明發高軒過圖

滕王蛺蝶江都馬一紙千金不當價異才天縱非力能

一作窮

畫工不是甘為下今代風流數大年含毫落筆開

山川忽忘朽老壓塵底却怪鳬鴻隨目前爾來八二復
秀出萬古河山才咫尺眼前安得有突兀復似天地初
開闢明窓寫出高軒過便逐愈湜聞吟哦晚知書畫真
有益却悔歲月來無多官禁修嚴斷過訪時於僻寺逢

稅鞅秀潤如行琮璧間清明似引星辰上憂悲愉佚百
不平河擘太華東南傾平生秀句囊區滿掇拾餘棄成
丹青平湖遠嶺開精神斗覺文字生清新未許二豪今
角立要知旁有衛夫人

擬古

盎中有聲囊不癭瞬息不如帶加緊人生七十今已半
一飽無時何可忍公侯早歲有如此奴婢蓐食支夜永
向來糠覈之子孫居鄰無傳家存并

贈知命

墨頭居士元方弟不肯作公稱法嗣外人怪笑那得知
他日靈山親授記學詩初學杜少陵學書不學王右軍
黃塵扶杖笑鄰女白衫騎驢驚市人靜中作業此何因
醉裏逃禪却甚真顧我無錢呼畢曜有人載酒尋子雲
君家魯直不解事愛作文章可人意一人可以窮一家
怪君又以太為累請將飲酒換吟詩酒不窮人能引睡
不須無事與多愁老不欲醒惟欲醉

大風

飛砂破面風裂石平林隱隱傾霹靂野火燎原塵漲天
道聞馬嘶不相得老翁強欲作少年立馬階除起無力
城南桃李春意動少待明朝莫相失

回風行

懸流洶洶從天來南風五日鬪不開御風起柁虎著翼
衝風擊纜顏死灰昨日逆風今日回萬人莫挽才浮杯
篙牽相賀天意得秋聲滿帆風倒桅天留異態須一怒

造物可得無嫌猜

贈張文潛

張侯便然腹如鼓
飢雷收聲酒如雨
讀書不計有餘處
尚著我輩千百許
翻湖倒海不作難
將軍百戰富善賈
弟子不必不如師
欲知其人視其主
秋來待試丞相府
穀馬礪兵吾甚武
問周不敵聞其語
一戰而霸在此舉
百年富貴要自取
入將公卿退爾汝
德如墨君誰敢侮

次韻寄答晁無咎

西湖欲雨樹煙滿風葉倒垂雲覆盃望湖樓上白頭人
獨倚闌干誰肯伴獨有詩人記病身清風千里寄行塵
豪華信有回天力驚開桃李閑新春往事不回如過雨

醉夢恍然忘惡語

前在澶州有讀無咎文編詩因以戲之無咎今以為言

人生如

幻此何尤未信黃金貴於土愛子千篇頃刻成借將胃
腹說吾人吟哦怪有芳鮮氣却被湖山識姓名

蘇子瞻詩云游

徧錢塘湖上境歸來文字帶芳鮮

文章廢退知難強身外虛華本無望

何曾臨水惜芒鞋却解逢人拈拄杖眼根清淨塵不留

登伽過盡不回頭

來詩云不應
越女三年留

家在中原歸未得江淮

斷道無行舟兩山相逢翻手疾欲謀一笑無寧日却慙
懷璞似周人祇可聞名不須識

送鄜州關司法

早歲相知晚相識抵掌回頭已陳迹萬里從軍壯此行
一筋鱸魚留不得夜靜關山秋月明莫聽嶺頭秋一作
流
水聲平世功名須少壯看君一箭下聊城

登鳳皇山懷子瞻

一本作
二首

蜿蜒曲龍腹山間隱樓觀孤高伏龍角浮圖刺雲漢修
林霜雪餘落葉青紅亂想見洞中人不知時節換咳唾
落江東江東兩眼中舉頭觸浮雲失脚驚飛鴻逢人自
笑謀身拙坐使紅塵生白髮入山便欲棄人間出山又
與松筠別數篇曾見使君詩前後登臨各一時妙舞新
聲難得繼清風明月却相宜朱闌行遍花間路看盡當
年題壁處更有何人問使君青春欲盡花飛去

子瞻云
應問使

君何處去憑花
說與春風知

古怨贈關彥長

世態輕浮君莫道相逢何必論才調鉛刀快利莫邪遲
果下翩翩望雲老人前安得無窮好應須富貴長年少
莫教白髮更棲遲不遭毀罵逢人笑

答無咎畫苑

卒行無好步事忙不草書能事莫促迫快手多麤疎君
看荷葦櫺

闕一字

扇崔家中叔三人俱掃除事物費歲月

收完神氣忘形軀恍然有得奪天巧衰顏生態能相如

市師信手無贏餘一日畫出東封圖眼前百口怪神速
背後十指爭押掄君家畫苑傾東都錦囊玉軸行盈車
補完破碎收亡逋欲得不計有與無問君此病何當祛君
言無事聊自娛世間何事非迷途挾策未必賢擣菹苑
中最愛文與蘇情親不獨生同閭自謂知子誰如余叔
也不癡回不愚憐君用意常勤渠揮毫灑墨填空虛風
梢雨葉出新意老樹僵立何年枯我生百事不留意外
物不足煩毆除翰墨纔能記名字模臨寫貌無工夫見

溺不救危不扶獨無一物充庖厨看君髮漆顏丹朱意
氣健如生馬駒逢人不信六十餘郁然一莖無白鬚呂
公落窠起釣屠南山四老東宮須人生晚達有如此應
笑虞翻早著書

次韻蘇公蠟梅

化人乃作繡樣花何年落子空山家羽衣霓袖浣香蠟
從此人間識尤物青瑣諸郎却未知天公下取仙翁詩
烏丸雞距寫玉葉却怪寒花未清絕北風驅雪度關山

把燭看花夜不眠明朝詩成公亦去長使詩仙誦佳句
湖山信美更負人已覺西湖屬此君坐想明年吳與越
行酒賦詩聽擊鉢

奉陪內翰二友醴泉避暑

疾雷倒海不成雨墨雲御日蠶不吐深院回廊晝日

一作

景長青簾朱幕風鈴語神仙中人龍作馬翠旌絳節從

天下竹冠芒屨紫綺裘曳杖林間觀物化清池

一作
青蓮照

眼自生涼修竹回陰欲過廊樽酒未空高興動含毫欲

下雲飛揚俗間道士業符醫未語已作庸人樣但知一
扇博百金豈識雙松到千丈蠅頭小字密著行四座歡
叫醒而狂忽驚天姥到庭戶風簾露草鳴寒蛩回天却
日有餘力小試席間留翰墨請公慎用補天子入佐后
皇和五石

送張秀才兼簡德麟

長安千門憎熱客我獨憐君來解熱呼兒具飯懶出口
藜羹不糝甘一啜北州別駕玉刻麟索書往見良何人

驛使別來無一字知有此情誰與親

寄子閔

煙昏晚寒風發屋行者抽篷離者哭青衫白髮兩相鮮
積雪朝陽眩雙目猛虎食子有分羹潔鷺割股謀補肉
妻孥不用哭窮途前府故人風義篤

贈黃氏子小德

黃童三尺世無雙筆頭滾滾懸秋江不憂老子難為父
平生崛起今心降我來喜共阿戎語應敵縱橫如急雨

生子還如孫仲謀豚犬漫多何足數黃家小兒名小德
眉如長林目如漆只今數歲已動人老人留眼看他日
笑君老蚌生明珠自笑此物吾家無君當置酒吾當賀
有兒傳業更何須

後山集卷三

欽定四庫全書

後山集卷四

宋 陳師道 撰

詩

寄外舅郭大夫

巴蜀通歸使妻孥且舊居深知報消息不忍問何如身
健何妨遠情親未肯疎功名欺老病淚盡數行書

南豐先生挽詞二首

早棄人間事真從地下遊丘原無起日江漢有東流身

世從違裏功名取次休不應須禮樂始作後程仇
精爽回長夜衣冠出廣庭勲庸留琬琰形像付丹青道
喪餘篇翰人亡更典刑侯芭才一足白首太玄經

暑雨

密雨吹不斷貧居常閉門東溟容有限西極更能東
濕炊懸釜翻床補壞垣倒身無著處呵手不成溫

送江楚州

濠梁初得意闕里舊論詩晚歲何多難經年始一辭淮

人饑饉後良吏拊循時欲託山陽簿翁歸不受私

送江端禮

正學元非世能詩新有聲諸公交鄭泰多士閉何生汎
愛經過數移書底裏傾又為淮海別兩眼向誰明

晁無咎張文潛見過

白社雙林去高軒二妙來排門衝鳥雀揮麈帶塵埃不
憚除堂費深愁載酒回功名付公等歸路在蓬萊

丞相溫公挽詩三首

恭默思良弼詩書正百工事多違謝傳天遽奪楊公一代風流盡三師禮數崇若無天下議美惡併成空

百姓歸周老三年待魯儒時方隨日化身已要人扶玉几雖來晚明堂訖授圖心知死諸葛終不羨曹蜍

少學真成已中年託著書輟耕扶日月起廢極吹噓得志寧論晚成功不願餘一為天下慟不敢愛吾廬

巨野

餘力唐虞後沉人海岱西不應容桀黠寧復有青齊燈

火魚成市帆檣藕帶泥十年塵霧底瞥眼恠鳬鷺

秋懷示黃預

窓鳴風歷耳道壞草侵衣月到千家靜林昏一鳥歸冥
冥塵外趣稍稍眼中稀送老須公等秋碁未解圍

送張支使

曠度逢知晚高才處下難清秋一鷗上拭目萬人看白
酒初同醉黃花已戒寒憑將衰老事一一報長安

送楊侍禁兼寄顏黃二公二首

相逢今已晚同府尚經年衆口不成虎諸公更薦賢兩
親須薄祿一障欲乘邊往問顏夫子何妨試著鞭
多問黃居士終年欠一書因人候消息有使報何如向
晚逢楊子真堪託後車親年方賴祿不惜借吹噓

送外舅郭大夫夔路提刑

天險連三峽官曹據上游百年雙鬢白萬里一身浮可
使人無訟寧須意外憂平生晏平仲能費幾狐裘

雪後黃樓寄負山居士

林廬煙不起城郭歲將窮雲日明松雪溪山進晚風人
行圖畫裏鳥度醉吟中不盡山陰興天留憶戴公

從蘇公登後樓

倏作三年別才堪一解顏樓孤帶清洛林缺見巴山五
月池無水千年鶴自還白鷗沒浩蕩愛惜鬢毛斑

送秦觀二首

士有從師樂諸兒却未知欲行天下獨信有俗間疑秋
入川原秀風連鼓角悲目前狔犬類未必慰親思

師法時難得親年富有餘端為李君御盡讀鄴侯書結
友真莫逆論才有不如折腰終不補可但曳長裾

別負山居士

田園相與老此別意如何更病可無酒猶寒已自和高
名胡未廣詩興尚能多沙草東山路猶煩一再過

次韻春懷

欲作歸田計無如二頃何折腰方賴祿拭面未傷和日
下鳥聲樂塵生馬跡多渡頭留小楫乘興得相過

別叔父錄曹

為吏專文法成家托弟昆三年如昨日一笑更何言扶
老須微祿移官實至恩兩疎元父子何日復東轅

泛淮

冬暖仍初日潮回更下風鳥飛雲水裏人語櫓聲中平
野容回顧無山會有終倚墻聊自逸吟嘯不須工

十五夜月

向老逢清節歸懷托素暉飛螢元失照重露已霑衣稍

稍孤光動沉沉萬籟微不應明白髮似欲勸人歸

胡士彥挽詞二首

晚進道前輩平生闕異聞吾猶識此老天豈喪斯文善
學傳家業英詞世不羣固應譏尚白官序見揚雲
此地來何晚經年見未頻薦賢仍睹命有道可辭貧徒
弟三千子聲名四十春襄陽耆舊內無復姓龐人

雪

初雪已覆地晚風仍積威木鳴端自語鳥起不成飛寒

巷聞驚犬鄰家有夜歸不無慙敗絮未易泣牛衣

晚出

應俗敢辭疾衝風寧小驅聊為一日役不憚百金軀雪
路無行迹冰枝有落烏寒門閉蕭瑟窮里聽欬吁

寄答李方叔

平生經世策寄食不資身孰使文章著能辭轍跡頻帝
城分不入書札訶何人子未知吾懶吾寧覺子貧

智寶院後樓懷胡元茂

晚渡呼舟疾寒城著靄深昏鷗明鳥道風葉亂霜林久
客登樓目中年懷舊心猶須一長笛領覽自霑襟

元日

老境難為節寒梢未得春一官兼利害百慮孰疎親積
雪無歸路扶行有醉人望鄉仍受歲回首望松筠

放懷

施食烏鳶喜持經烏鼠聽杖藜矜矍鑠顧影恠伶俜門
靜行隨月窓虛臥見星擁衾眠未穩艱阻飽曾經

送伯兄赴吏部改官

先子初增秩年侵鬢已皤念兄今善繼此別喜如何親
老家仍困門衰仕未多猶須教兒子早要中文科

寄張文潛

今代張平子雄深次子長名高三俊上官立右螭傍車
笠吾何恨飛騰子莫量時平身早達未用夢凝香

後湖晚坐

水靜靜一作淨偏明眼城荒可當山青林無限意白鳥有餘

閒身致江湖上名成伯季間目隨歸雁盡坐待莫鷗還

送孝忠二首

老眼元多淚春風見此行久為貧賤別更覺急難情斗
食吾堪老詞場爾向榮未須憐野鷺家法付宣城

經史三年學聰明一旦開把文甘潦倒數日待歸來士
惠聲名早官今歲月惟有親須薄祿臨路尚徘徊

寄張宣州

與世情將盡懷仁老未忘故人今五馬高處謾三長詩

豈江山助名成沈鮑行肯為文俗事打鴨起鴛鴦

西湖

小徑才容足寒花只自香官池下鳬雁荒塚上牛羊有
子吾甘老無家去未量三年哦五字草木借輝光

別月華嚴

寓世生同里隨方去有情來為百年別不惜片時程齋
鉢須勤供經鐘莫倦鳴當來第三會此界却逢迎

送吳先生謁惠州蘇副使

聞名欣識面，異好有同功。我亦慙吾子，人誰恕此公。
百年雙白鬚，萬里一秋風。為說任安在，依然一秃翁。

別觀音山主

會合應生理，過逢豈近緣。情親見今日，語妙記當年。
閉戶安禪主，衝風逆水船。不應清夜月，故作別時圓。

離頰

河市千人聚，寒江百尺牽。吾生能幾日，此地費三年。
叢竹防供爨，池魚已割鮮。拙勤終不補，他日愧無傳。

湖上

湖上難為別梅梢已著春
林喧鳥啄啄風過水鱗鱗
緣有三年盡情無一日親
白頭厭奔走何地與為鄰

病起

今日秋風裏何鄉一病翁
力微須杖起心在與誰同
災疾資千悟冤親併一空
百年先得老三敗未為窮

九月九日魏衍見過

節裏能相過談間可解憂
致疎君未肯得此我何由
語

到君房妙詩同客子遊一經從白首萬里有封侯

次韻無斁偶作二首

肩聳三峯峻眉龐八字橫玄談人絕倒家法句新清八
駿先張子諸公少賈生已傳烏鵲喜欲聽鵲鵲聲

此老三年別何時萬里回更無南去雁猶見北枝梅會
有哀籠鳥寧須溺死灰聖朝無棄物與子賦歸哉

次韻晁無斁除日述懷

世學違從衆名家最近天感時猶壯志得句起衰年衰

酒無何飲陶琴不具絃平生揮翰手幾見絕韋編

次韻無數雪後二首

閉閣春雲薄開門夜雪深江梅猶故意湖雁起歸心草
潤留餘澤窻明度積陰殷勤報春信屋角有來禽

取性無通介隨時有異同雲餘蓋地白春淺著梢紅寄

食虛長算

魏衍注云時先生婦翁郭大論詩闕近功相
夫曹州使宅晁時為州教官

看不相棄賴有古人風

河上

背水連漁屋橫河架石梁窺巢烏鵲競過雨艾蒿光鳥
語催春事窓明報夕陽還家慰兒女歸路不應長

寄無穀

敬問晁夫子官池幾許深已應飛鳥下復作臥龍吟待
我中痾愈同君把臂臨泥塗無去馬夏木自來禽

宿深明閣二首

窈窕深明閣晴寒是去年老將灾疾至人與歲時遷默
坐元如在孤燈共不眠莫年身萬里賴有故人憐

縹緲金華伯人間第一人劇談連晝夜應俗費精神時
要平安報反愁消息真墻根霜下草又作一番新

除夜

七十已強半所餘能幾何懸知莫景促更覺後生多遁
世名為累留年睡作魔西歸端著便老子不婆婆

別寶講主

此地相逢晚他方有勝緣咒功先服猛戒力得扶顛暫
息三支論重叅二祖禪

趙州臨濟
皆曹人也

夜牀鞋脚別何日著

行纏

老柏三首

并序

勝果院後庭有柏見之二十年矣疎瘦如故余寓其
舍數以水溉之遂有生意

庭柏無生意摧殘二十秋稍霑杯水潤已與歲寒謀黃
裏青青出愁邊稍稍瘳會看笙鶴下暮雀莫深投

英姿帶枯槁勁節闕和柔物理有興壞人情成去留稍
看棲鳥集聊待晚風秋解道庭前柏何曾識趙州

歲月那能記風霜亦飽經
槁乾仍故節潤澤出新青
色與江波共聲留靜夜聽
輝輝垂重露點點綴流螢

次韻螢火

年侵觀物化共被歲時催
熠熠孤光動翩翩度水來
稍能穿幔入已復受風回
投卷吾衰矣微吟子壯哉

次韻夏日江村

漏屋簷生菌臨江樹作門
捲簾通燕子織竹護雞孫
向夕微一作風涼進相逢故意存
一作需衣汗垢存何當加我歲從

子問乾坤

次韻觀月

風雲隨落日河漢欲回天
隔巷如千里還家已再圓
簾疎分細細江淨共娟娟
他日吾何適聽詩說去年

夏夜有懷

臥念張居士逃名老石根
學詩端得瘦識字即空樽
鳴笛夜宜遠燈花曉更繁
未須哀老子也復守丘園

觸目

溪響饑魚食川明柱影斜驚禽穿密竹噪鵲立浮查谷
暗山藏雨林喧雀啁蛇鄉閭等行路何處一作自更為家

送高推官

先生鍾舊德大府冠羣能過手無難事逢人有異稱薦
賢餘一鶚夙記契千燈看挽秦梁纜頭頭數不勝

柏

用直寧論世名成不待官低枝緣我有偃蓋到誰看秀
色有新故英姿無暑寒要為千載計豈慮萬牛難

捕狼

一狼將四子二嶺走千羊意得無前敵時乖闕後防寧
知射生手已發弩機張會便烏鳶飽空令豺虎傷

和元夜

茄鼓喧燈市車輿避火城彭黃

彭祖樓黃樓

爭地勝汴泗迫

人清梅柳春猶淺闕山月正

一作自

明賦詩隨落筆端復

可憐生

登快哉亭

城與清江曲，泉流亂石間。
夕陽初隱地，暮靄已依山。
度鳥欲何向，奔雲亦自閑。
登臨興不盡，稚子故須還。

春夜

宿鳥一枝足，爭林終日鳴。
庭花當戶發，江月向人明。
鳥度清溪影，風回晚市聲。
夢中無好語，池草為誰生。

登燕子樓

綠暗連村柳，紅明委地花。
畫梁初着燕，廢沼已鳴蛙。
鷗沒輕春水，舟橫著淺沙。
相逢千歲語，猶說一枝花。

棟花

密葉已成蔭高花初著枝幽香不自好寒艷未多知會
見垂金彈聊容折紫綾粉身非所恨猶復得聞思

送河間呂令

子固甥

今日中牟令當年太守孫獨能憐此老肯避席為門寒
日風濤壯邊城簿領繁平生子曾子白首得重論

寄潭州張芸叟二首

湖嶺一都會西南更上游秋盤堆鴨脚春味薦猫頭宣

室來何暮蒸池得借

一作惜

留孰知為郡樂莫作越鄉憂

去國如前日為邦得舊游
霜柑先落手春鴈幾回頭
只道風沙惡寧知賈宋留
賦詩真有助弔古不同憂

送曹秀才

甲第衣冠後東遷歲月侵
情親期一諾急病闕千金
孰並還家樂毋忘在菖心
時能記衰病聲迹到雲林

杜侍郎挽詞三首

美政真吾母名家更杜陵
于張從昔少魯衛至今稱
絲

竹中年好詞華夙世能周南棠棣傳平世幾人登

驥駉方懷遠松筠忽有秋雍容名士數終始法家流凜凜驚千載堂堂閔一丘能令羊季子不肯過西州

身去風流在人難玉石分平生才一見治行已多聞更覺知音少還修地下文它年九原淚仍是兩馮君

黃預挽詞四首

敏慧仍江夏風流更妙年貧焚酒家券病得里胥錢精爽來鷹隼清明瀉澗瀾無兒傳素業有淚徹黃泉

骨秀神仙數詩清雅頌才識高懸日月韻勝絕塵埃去
就堪同事推殘盡一哀了知天上去不似世間來
志大期千里身宜置一丘英詞真蓋世爽氣已橫秋地
要黃金骨天成白玉樓平生斲泥手斤斧恐長休
玉筋凝潮後絲桐藝業餘遠途憎早悟曠度得中疎子
逝今何遽吾生孰與居豈無文士傳未有茂陵書

秋懷四首

積雨不受暑既晴還得秋未免困河魚寧如喘吳牛風

梧有先聲巢燕無後留人生行樂爾一經今白頭
小雨斷復續回斜落晚風寒心生蟋蟀秋色傍梧桐
與遙山碧花欺晚照紅口須談世事目已失飛鴻

山斷開平野河回殺急流登臨須向夕風雨更宜秋
急後飛鴈翩翩不下鷗晚舟猶小待莫雀已深投
梨埒當千戶魚防擁萬頭寧須一網盡不為百人留
密雨點急水驚風擘繫舟百年供轉徙因病得夸猶

元日雪二首

半夜風如許平明雪皓然簾疎穿瑣細竹壓更嬋娟窘
免走留迹饑鳥鳴乞憐遙忻炎海上還復得新年

度臘闕三白開正還積陰炊煙茅舍濕噪雀莫枝深短

髮千方誤中年萬里心成書著巖穴或有後人尋

闕三白一

作闕
三白

送張蘄縣

接祿才餘歲為邦近故園案圖三萬戶鎮靜五千言雪
盡春泥滑風生沙水昏猶須放琴客坐席稍能溫

送何子溫移亳州三首

治出龍城守名高水部即清明人共識風味獨難忘骨
立秦書瘦鬚粘檜密香烹鮮師老耳曳尾肯蒙莊

胃衿曾誦賦皓首始登門意得寧論晚心交不待言向
來期北上可復改南轅

嘗請湖越
而得毫

畫地數佳政叢談何

處村

復作中年別仍懷後日憂關山遮極目汴泗只東流政
好遭頻借詩清得暗投會看靈壽杖扶出富民侯

覽勝亭

斷岸通橫水吹花滿繫船中年擅幽獨輟食買林泉草
木真宜主江山故作妍升沉有流轉且復賦歸田

何太沖挽詞二首

課最三川守名成萬石君平生欠一識聲烈即多聞兜
率真歸處琴臺只斷雲傷心今夜月忍便到初墳

哀挽諸儒競豐碑故吏繁素車紛雨泣丹旌與風翻幾
地留遺愛它年作九原涕流耆舊盡不獨為鄉園

送大兄兼寄趙團練

貧有分離苦官無早晚宜又為千里別未覺十年遲日
與江山遠風連草木悲平生劉子政見可只一作共論詩

送張秀才

學又三年積功收一日長擅場推老手附尾得一作續諸

郎度鳥界晴碧過雲回夕黃孰知詩有驗莫愠路無糧

送智叔令咸平

二謝將能事重陽只故臺固須衝節去便恐帶秋回敏

捷才無盡鋪張意有開猶須記衰疾書與鴈同來

壽安縣君挽詞

兩大推平日三從播後聲憂勤登上壽簫鼓閉佳城
總布千人從松楸十里行哀榮動鄰里點筆競諸生

寄張大夫

只應青眼老尚記白頭翁一別今何向三年信不通
不應書字倦未有北來鴻肯作彭城守何時馬首東

懷遠

任淵注云此詩屬東坡

海外三年謫天南萬里行生前只為累身後更須名未
有平安報空懷故舊情斯人有如此無復涕縱橫

答田生

酒亦有何好人今未肯忘苟無愁可解何必醉為鄉賸
欲論奇字終能諱秘方直饒肌骨秀正要畫眉長

寄張學士

舜民

湖海三年別譙徐一日間經時猶未見凡事信多艱理
極那須說情生不自還從來闕聲問相見若為顏

雪中寄魏衍

薄薄初經眼輝輝已映空
融泥還結凍落木復沾叢
意在千山表情生一念中
遙知吟榻上不道絮因風


送澶州錄曹宋參軍

宦遊男子事訪別故人情
能吏于今少春風及此行
英雄餘戰伐犴獄寄廉平
未肯輕哀疾人來闕寄聲

早春

度臘不成雪迎年遽得春
水開還舊綠魚喜躍修鱗
柳

及年年發愁隨日日新老懷吾自異不是故違人



後山集卷四